

再生記續玄怪錄
玄怪記靈鬼志



玄

怪

記

徐
玄
撰

中
華
書
局

玄怪記

此據龍威秘書本
排印初編各叢書
僅有此本

玄怪記

唐 徐 炫 撰

陽雍伯嘗設義漿以給行旅。一日有行人飲訖懷中出石子一升與之曰。種此可生美玉并得好婦如其言種之。有徐氏女極美。試求之。徐公曰。得白璧一雙即可。乃於所種處得璧。遂妻之。

楊道和夏於田中有雷神至桑下。霹靂下擊之。道以鋤格其腋。遂落地不得去。色如丹。目如鏡。毛角長三尺餘。狀如六畜頭似獼猴。

盧汾夢入螻穴。見堂宇危豁。題曰審雨堂。

廬陵太守龐企。自云其乃祖非罪繫獄。牆上有螻蛄行其左右。謂曰。爾有神能活我死否。因投食與之。螻蛄食盡去。有頃復出行。形體稍大。乃復與食。如此數月間。其大如豚。及將刑之夜。螻蛄掘壁爲大穴。乃破械從之出。亡後遇赦免。故龐氏世祀螻蛄。

狄希中山人也。能造千日酒。飲之千日醉。時有州人姓劉名玄石。好飲酒。往求之。希曰。我酒發來未定。不敢飲君。石曰。縱未熟。且與一盃得否。希中聞此語。不免飲之。復索曰。美哉。可更與之。希曰。且歸。明日當來。只此一盃。可眠千日。石別似有忤色。至家醉死。家不之疑。哭而葬之。經三年。希曰。玄石必應酒醒。宜往問之。既往石家。詰曰。石在家否。家人皆怪之。曰。玄石亡來。服已闋矣。希驚曰。酒眠千日。今合醒矣。乃命其家

人鑿塚破棺看之。塚上汗氣徹天。遂令發塚。方見開口張口。引聲而言曰。快哉醉我也。因問希曰。汝作何物。令我一盃大醉。今日方醒。日高幾許。墓上人皆笑。被石酒氣衝入鼻中。亦各醉臥三月。

青蚨似蟬而差大。其味辛可食。每生子必於草葉大如蠶子。人將子歸。則母亦飛來。卽以母血塗錢八十文。以子血復塗餘錢。每市物。或先用子者。卽母歸。用母卽子歸。如此輪環不已。

安豐侯王戎。常赴人家殯殮。主人治棺未竟。安豐在車上。仰見空中有一異物如鳥。熟視轉大。漸近見一乘赤馬車。一人在中。着幘赤衣。手持一斧至地下。車徑入王車中。廻環久之。謂王曰。君神明清照。物無隱情。凡人家殯殮葬送。苟非至親。不可急往。良不獲已。可乘赤車。令髡奴御之。及乘白馬。則可禳之。因謂戎君當致位三公。語良久。主人內棺當殯。衆客悉入。此鬼亦入。旣入戶。鬼便持斧行棺。牆上有一親趨棺。欲與亡人訣。鬼便以斧正打其額。卽倒地。左右扶出。鬼於棺上視戎而笑。衆悉見鬼。持斧而出。